

JUAN ENRIQUE (JUANCHO) IRAUSQUIN - ESTADISTA Y POLITICO

Juan Enrique Irausquin a nace na Aruba dia 3 di december 1904. Despues di Lagere School na Aruba, el a bay Curaçao na unda el a sigui diferente curso den educacion comercial y tambe den Accounting, Money and Banking.

Na edad di 14 aña el a drenta servicio di Hollandsche Bank y den un tempo relativamente cortico a yega te na "procuratiehouder." Impulsa pa un ambicion di superacion señor Irausquin na 1929 a tuma retiro for di Hollandsche Bank y a drenta servicio di firma John Gerard Eman, cu durante algun tempo tabata haci negoshi bancario.

Na 1936 firma John Gerard Eman den cooperacion cu Maduro & Curiel's Bank N.V. a dicidi di funda e prome banco na Aruba, Aruba Bank N.V. Juancho - manera popularmente señor Irausquin tabata conoci - a bira su Director, puesto cu el a keda ocupa te na aña 1951. Señor Irausquin tabata activo riba hopi tereno. E tabata presidente di Camara di Comercio, di Comision di Turismo, miembro di hopi comision economico, co-fundador di Rotary Club y Home Building Foundation na Aruba.

Na 1947 el a bira miembro di Staten y despues a sali re-eligi den tur eleccion na cual el a tuma parti.

Varios biaha el a wordo nombra presidente di Staten den reconocimiento pa su capacidad parlamentario.

For di aña 1948 Juancho a participa na tur conferencia importante tocante autonomia pa Antiyas Hulandes, manera Conferencia di Mesa Rondo y e asina yama Comision Chikito.

Na 1949 Juan Enrique Irausquin a funda Partido Patriotico Arubano (P.P.A.). Den e prome eleccion pa Consejo Insular na Aruba, Juancho a sali eligi, kedando miembro di e consejo aki pa varios aña. Su partido a keda den oposicion te na aña 1954.

Dia 1 di april 1956 Juan Enrique Irausquin a wordo nombra Ministro di Finanza y Fomento, un

puesto importante cu el a keda ocupa te na su morto dia 20 di juni 1962.

Juancho tabata casa cu Maria Waitzberg.

Den reconocimiento pa su hopi meritonan riba tereno politico, economico y social, Su Mahestad Reina Juliana a haña bon di nombre Officier den Orde di Oranje Nassau.

Juan Enrique Irausquin ta wordo reconoci como un gran luchado, cu tabata tin parti activo den desaroyo economico di Antiyas Hulandes.

Aruba en particular y Antiyas Hulandes en general a honra memoria di e ilustre Arubano aki inaugurando un estatua riba Juan Enrique Irausquinplein dilanti di Postkantoor di Oranjestad.

Vliegveld di Saba y un caya na St. Maarten tambe tin su nomber.

Ademas pa recorda su di 30 aña di fayecemento Gobierno di Aruba a cambia un parti di L.G. Smith Boulevard den su nomber cu awe ta Juan Enrique Irausquin Blvd.

Servicio Postal di Aruba dia di e decimo Aniversario di Status Aparte, dia 1e di januari 1996, ta honra su memoria cu un stampia special na balor di 100 cent.